

Katika Upatanifu na Kristo

Nasi tukitenda kazi pamoja naye twawasihi msiipokee neema ya Mungu bure—
2 Wakorintho 6:1.

Mbingu yote ina maslahi na kazi inayoendelea katika ulimwengu huu, ambayo ni kuandaa wanaume na wanawake kwa maisha ya baadaye ya milele. Ni mpango wa Mungu kwamba mawakala wa kibinadamu wawe na heshima ya juu ya kufanya kama watenda kazi pamoja na Yesu Kristo katika uongoaji wa roho. Neno la Mungu linafunua wazi kwamba ni nafasi ya kila Mtumishi katika kazi hii kutambua kwamba yuko Mmoja upande wake wa kulia aliye tayari kumsaidia katika kila juhudi ya kweli ili kufikia ubora wa juu zaidi wa kimaadili na wa kiroho katika kazi ya Bwana.

Hii itakuwa ndiyo hoja ya wote wanaohisi hitaji lao la msaada. Wanapaswa kuiona kazi ya Mungu kuwa ya heshima mno na takatifu na wanapaswa kuleta Kwake dhabihu za furaha na shukrani kila siku, katika kubadilishana na nguvu ya neema Yake, ambayo kwayo wanawezeshwa kuwa na maendeleo katika maisha matakatifu. Mtenda kazi anapaswa daima kuwa na mtazamo wa unyenyekevu juu yake mwenyewe, akizingatia fursa zake nyingi alizopoteza kwa kukosa bidii na tathmini ya kazi. Hapaswi kukata tamaa, bali analazimika kuendelea kuongeza juhudi zake ili kuukomboa wakati....

Sio lazima kwamba mtu awaye yote lazima akubali kushindwa na majaribu ya Shetani na hivyo kuharibu dhamira yake na kumhuzunisha Roho Mtakatifu. Kila Baraka imetolewa katika Neno la Mungu ambapo wote wanaweza kupata msaada wa Mungu katika jitihada zao ili kushinda. Ikiwa wanamtanguliza Yesu mbele yao watabadilishwa na kufanana Naye. Wale wote ambao kwa imani wanaye Yesu akikaa ndani yao wanabeba nguvu katika kazi yao ambayo inawawezesha kufanikiwa. Wataendelea kuwa na ufanisi zaidi na zaidi katika kazi yao na Baraka ya Mungu, inayooneshwa katika ustawi wa kazi, itashuhudia kwamba wao kwa kweli ni watenda kazi pamoja na Kristo. Lakini vyo vyote vile mtu anavyozidi kukua katika maisha ya kiroho, kamwe hawezi kufika mahali ambapo hatahitaji kuchunguza Maandiko kwa bidii; kwa maana ndani yake kunapatika ushahidi wa Imani yetu. Kila eneo la mafundisho, hata kama yakiwa yamekubaliwa kuwa ukweli, yanapaswa kupimwa kwa sheria na ushuhuda; ikiwa hayawezi kukubaliana na kipimo hicho, “hakuna nuru ndani yake.”

Mpango mkuu wa ukombozi, kama unavyofunuliwa katika kazi ya mwisho kwa siku hizi za mwisho, inapaswa kuchunguzwa kwa umakini mkubwa. Matukio yanayohusiana na patakatifu pa mbinguni yanapaswa kuwa na mguso mkubwa sana kwenye akili na mioyo ya wote ili waweze kuwavutia wengine. Wote wanapaswa kuwa na uelewa zaidi kuhusiana na kazi ya upatanisho, ambayo inaendelea katika patakatifu mbinguni. Ukweli huu mkuu utakapotambuliwa na kueleweka, wale ambao wanaushikilia watafanya kazi kwa mapatano na Yesu ili kuwaanda watu kusimama katika siku kuu ya Mungu na juhudi zao zitafanikiwa

(Testimonies for the Church 5:573-575).